

REGIONAL NEWS UNIT  
ALL INDIA RADIO, AGARTALA  
Date: 18-05-2024  
Time: 07:55-08:05 PM Hrs  
BENGALI EVENING BULLETIN

---

Headlines :

- (১) রাজ্যের বিভিন্ন স্থানে বিদ্যাজ্যোতি স্কুলের কম্পার্টমেন্টাল প্রাপ্ত ছাত্রছাত্রীদের জন্য বিশেষ কোচিং-এর ব্যবস্থা করা হয়েছে ।
- (২) পশ্চিম ত্রিপুরা লোকসভা আসনের রিটার্নিং অফিসার ড: বিশাল কুমার আজ উমাকান্ত একাডেমিতে ভোট গণনা কেন্দ্র পরিদর্শন করেন ।
- (৩) অষ্টাদশ লোকসভা নির্বাচনের পঞ্চম পর্যায়ের প্রচার আজ বিকেলে শেষ হয়েছে ।
- (৪) সদরের আন্ত: স্কুল ক্রিকেট প্রতিযোগিতার আজ অনুষ্ঠিত দুটি খেলায় কেন্দ্রীয় বিদ্যালয় ও হিন্দি স্কুল জয়লাভ করেছে ।

\*\*\*\*\*

Vidyajoti prakalpa Meeting-West :

পশ্চিম জেলার জেলাশাসক তথা এই জেলার বিদ্যাজ্যোতি প্রকল্পের চেয়ারম্যান ডা: বিশাল কুমার আজ আকাশবাণীকে জানিয়েছেন, CBSE-র মাধ্যমিক এবং দ্বাদশ মানের চূড়ান্ত

পরীক্ষায় এবছর বিদ্যাজ্যোতি স্কুলে যে সমস্ত ছাত্রছাত্রীরা কম্পার্টমেন্টাল পেয়েছে তাদের জন্য বিশেষ কোচিং-এর ব্যবস্থা করা হয়েছে। তিনি জানান, গ্রীষ্মের ছুটিতে বিদ্যাজ্যোতি স্কুলগুলিতে প্রতিদিন ৩ থেকে ৪ ঘন্টা বিশেষ কোচিং ক্লাস করানো হবে। প্রতি চারজন ছাত্রছাত্রীর জন্য একজন করে নোডাল টিচার থাকবেন। বিদ্যাজ্যোতি স্কুলের দশম ও দ্বাদশ শ্রেণীর চূড়ান্ত পরীক্ষার ফলাফল পর্যালোচনার জন্য গতকাল পশ্চিম জেলাশাসক অফিসের কনফারেন্স হলে এক বৈঠক অনুষ্ঠিত হয়। এই বৈঠকে পশ্চিম জেলার ৩০টি বিদ্যাজ্যোতি স্কুলের প্রিন্সিপাল এবং শিক্ষা দপ্তরের আধিকারিকরা অংশ গ্রহণ করেন। জেলাশাসক জানান, এবছর পশ্চিম জেলার বিদ্যাজ্যোতি প্রকল্পাধীন ২৩টি স্কুলের দ্বাদশ মান পরীক্ষায় পাশের হার ৬৪ শতাংশ এবং মাধ্যমিকে পাশের হার ৬০ শতাংশ। এ বছর পশ্চিম জেলায় দ্বাদশ পরীক্ষায় ৪৮৭ জন এবং মাধ্যমিক পরীক্ষায় ৭৩৫ জন কম্পার্টমেন্টাল পেয়েছে। জেলাশাসক বলেন, প্রতি বিদ্যাজ্যোতি স্কুলে ছাত্রছাত্রীদের প্রতি দায়বদ্ধতা বাড়াতে হবে। বিদ্যাজ্যোতি স্কুলে শিক্ষার মান উন্নয়নের জন্য গতকালের পর্যালোচনা বৈঠকে বেশ কিছু সিদ্ধান্ত নেওয়া হয়েছে।

\*\*\*\*\*

**vidyajoti-Sepahijala :**

সিপাহীজলা জেলার শিক্ষা আধিকারিক মলয় ভৌমিক জানিয়েছেন, জেলায়ও বিদ্যাজ্যোতি স্কুলগুলিতে C.B.S.E-র মাধ্যমিক ও উচ্চ মাধ্যমিক পরীক্ষায় যে সমস্ত পরীক্ষার্থীরা কম্পার্টমেন্টাল পেয়েছে তাদের জন্য গ্রীষ্মের ছুটিতে বিশেষ কোচিং-এর ব্যবস্থা করা হয়েছে। গতকাল থেকেই এই বিশেষ

কোচিং শুরু হয়েছে। সিপাহীজলা জেলায় মাধ্যমিকে ২৩৮ জন ও উচ্চ মাধ্যমিকের ২৬৯ জন কমপার্টমেন্টাল পেয়েছে। মাধ্যমিকে পাশের হার প্রায় ৬০ শতাংশ ও উচ্চ মাধ্যমিকে ৪৭ শতাংশ।

\*\*\*\*\*

#### **Visit of returning officer :**

পশ্চিম ত্রিপুরা লোকসভা আসনের রিটার্নিং অফিসার তথা জেলা শাসক ডাক্তার বিশাল কুমার আজ উমাকান্ত একাডেমিতে লোকসভার ভোট গণনা কেন্দ্র পরিদর্শন করেন। তিনি জানান, গণনার দিন ভোট কেন্দ্রে ত্রিস্তরীয় নিরাপত্তা ব্যবস্থা থাকবে। ইতিমধ্যে গণনা কর্মীদের প্রশিক্ষণ শুরু হয়েছে। পশ্চিম জেলার সবকটি মহকুমাতে কাউন্টিং সুপারভাইজার এবং মাইক্রো অবজারভারদের প্রশিক্ষণ দেওয়া শেষ হয়েছে। তিনি জানান, ইভিএমগুলি কড়া নিরাপত্তায় স্ট্রং রুমে রাখা হয়েছে।

\*\*\*\*\*

#### **Vidyajoti-North :**

CBSE পরীক্ষায় উত্তর জেলায় বিদ্যাজ্যোতি স্কুলগুলির ফলাফল নিয়ে ধর্মনগরের বীর বিক্রম ইনস্টিটিউশনে আজ এক পর্যালোচনা বৈঠক অনুষ্ঠিত হয়। এই বৈঠকে শিক্ষা দপ্তরে আধিকারিকগণ বিদ্যাজ্যোতি স্কুলের প্রিন্সিপাল শিক্ষক-শিক্ষিকা এবং অভিভাবকগণ উপস্থিত ছিলেন। এই সভায় সিদ্ধান্ত হয় CBSE পরীক্ষায় যারা কমপার্টমেন্টাল পেয়েছে তাদের জন্য আগামী ২০শে মে থেকে বিশেষ কোচিং শুরু হবে। ধর্মনগরস্থিত বীর বিক্রম ইনস্টিটিউশনের প্রিন্সিপাল রঞ্জু শর্মা এখবর জানান। উত্তর জেলার ভারপ্রাপ্ত শিক্ষা আধিকারিক সুখময় নাথ জানান, উত্তর

জেলার তিনটি মহকুমাতে মোট ১৫টি বিদ্যাজ্যোতি স্কুল রয়েছে। এই জেলায় CBSE পরীক্ষায় বিদ্যাজ্যোতি পাশের হার মাধ্যমিকে ৫০ শতাংশ ও উচ্চ মাধ্যমিকে পাশের হার ৪৯.৭ শতাংশ।

\*\*\*\*\*

#### **Accident death :**

আগরতলা সাব্রুম জাতীয় সড়কের সূর্যমনিগর এলাকায় আজ যাত্রীবাহী বাস ও বাইকের মুখোমুখি সংঘর্ষ হয়। এতে সম্রাট ওরাং নামে বাইক চালকের মৃত্যু হয়। পুলিশ সূত্রে এখবর জানা গেছে।

\*\*\*\*\*

#### **Sensitization Workshop :**

তামাক নিয়ন্ত্রণ বিষয়ক এক সচেতনতামূলক কর্মশালা আজ কৈলাশহর সার্কিট হাউসের কনফারেন্স হলে অনুষ্ঠিত হয়। ভলান্টারি হেলথ এশোসিয়েশন অব ত্রিপুরা এর উদ্যোগে ও ঊনকোটি জেলা প্রশাসনের সহযোগিতায় এই কর্মসূচির আয়োজন করা হয়। এখানে বিভিন্ন সরকারি দপ্তর ও প্রতিষ্ঠান থেকে সরকারী আধিকারিক ও কর্মকর্তারা অংশ নেন। কর্মশালায় উপস্থিত ছিলেন, ঊনকোটি জেলার অতিরিক্ত জেলা শাসক দশরথ দেববর্মা, বরিষ্ঠ উপ-সমাহর্তা বিজয় সিনহা, সমাজ কল্যাণ ও সমাজশিক্ষা দপ্তরের জেলা পরিদর্শক বিদ্যাসাগর দেববর্মা, কুমারঘাটের মহকুমা স্বাস্থ্য আধিকারিক ডাঃ সুচরিত চাকমা প্রমুখ। বিভিন্ন বক্তা এখানে বলেন, তামাক জনস্বাস্থ্যের জন্য বড় হুমকী। অসংক্রামক রোগের জন্য এটি ঝুঁকির কারণ। আজকের কর্মশালায় ঊনকোটি জেলা সদর কৈলাশহরকে ধূমপানমুক্ত শহর

হিসাবে পরিগণিত করা, তামাক নিয়ন্ত্রণ আইন পুরোপুরিভাবে প্রয়োগ করা ইত্যাদি বিষয়ে গুরুত্বারোপ করা হয়।

\*\*\*\*\*

#### **Update Akashvani :**

শ্রোতাবন্ধুরা, আকাশবাণীর সংবাদ সহ বিবিধ খবরের বিস্তারিত আপডেট পেতে লগ ইন করুন - ডব্লিউ, ডব্লিউ, ডব্লিউ ডট, নিউজ অন এআইআর ডট কম এবং নিউজ অন এআইআর অ্যাপ, এবং টুইটার অর্থাৎ এক্স প্ল্যাটফর্মে। আপডেট পেতে দেখুন আকাশবাণী নিউজ আগরতলা / ফেসবুকে এআইআর নিউজ আগরতলা এবং ইউ টিউবে এআইআর নিউজ আগরতলা।

\*\*\*\*\*

#### **Election, 5th phase :**

অষ্টাদশ লোকসভা নির্বাচনের পঞ্চম পর্যায়ের প্রচার আজ বিকেলে শেষ হয়েছে। এই পর্বে আগামী ২০শে মে ভোটগ্রহণ গ্রহণ করা হবে। এই পর্বে, ৬টি রাজ্য এবং ২টি কেন্দ্রশাসিত অঞ্চলের ৪৯টি আসনে ভোটাররা তাদের ভোটাধিকার প্রয়োগ করবেন। এই পর্বে বিহারের ৫টি, ঝাড়খণ্ডের ৩টি, মহারাষ্ট্রের ১৩টি, ওড়িশার ৫টি, উত্তর প্রদেশের ১৪টি, পশ্চিমবঙ্গের ৭টি, জম্মু ও কাশ্মীর এবং লাদাখের ১টি করে আসনে ভোটগ্রহণ করা হবে।

\*\*\*\*\*

#### **Election, 6th phase :**

২০২৪ সালের লোকসভা নির্বাচনের ষষ্ঠ পর্যায়ে ৭টি রাজ্য ও ১টি কেন্দ্রশাসিত অঞ্চল থেকে ৮৮৯ জন প্রার্থী নির্বাচনে প্রতিদ্বন্দ্বিতা

করবেন। এই পর্বে ৫৮টি আসনের জন্য মোট ১৯৭৮টি মনোনয়ন পত্র দাখিল করা হয়। সমস্ত মনোনয়নপত্র পরীক্ষা করার পরে, ৯০০টি বৈধ বলে জানানো হয়।

\*\*\*\*\*

#### **BJP Rally :**

রাজ্য সরকারের বিরুদ্ধে বিরোধী দলগুলির প্রচারের প্রতিবাদে আজ রাজধানী আগরতলা সহ সারা রাজ্যে বিজেপি'র উদ্যোগে বিক্ষোভ মিছিলের আয়োজন করা হয়। আগরতলায় এই মিছিলে উপস্থিত ছিলেন প্রদেশ বিজেপি সভাপতি রাজীব ভট্টাচার্য, রাজ্য মন্ত্রিসভার সদস্য রতনলাল নাথ, সান্তনা চাকমা, আগরতলা পুর নিগমের মেয়র দীপক মজুমদার সহ অন্যান্য নেতৃবৃন্দ। এদিকে, খোয়াই শহরে বিক্ষোভ মিছিলে উপস্থিত ছিলেন বিজেপির খোয়াই মন্ডল সভাপতি সুব্রত মজুমদার, সাধারণ সম্পাদক তাপস কান্তি দাস, পুর পরিষদের চেয়ারপার্সন দেবশীষ নাথ শর্মা প্রমুখ।

বিজেপি বিলোনিয়া মন্ডলের উদ্যোগে পাইখোলা বাজারে অনুষ্ঠিত বিক্ষোভ মিছিলের নেতৃত্ব দেন মন্ডল সভাপতি গৌতম সরকার। জোলাইবাড়ি মন্ডলের উদ্যোগে বাইখোড়া বাজারে অনুষ্ঠিত বিক্ষোভ মিছিলের নেতৃত্ব দেন বিজেপির দক্ষিণ জেলা কমিটির সদস্য মনীন্দ্র বিশ্বাস ও পরিমল দাস প্রমুখ।

\*\*\*\*\*

#### **CPIM Deputation :**

সিপিআইএম পশ্চিম ত্রিপুরা জেলা কমিটির পক্ষ থেকে ১০ দফা দাবির ভিত্তিতে আজ আগরতলায় পশ্চিম ত্রিপুরা জেলার জেলাশাসক ডা: বিশাল কুমারের কাছে ডেপুটেশন প্রদান করা

হয়। ডেপুটেশনে উপস্থিত ছিলেন সিপিআইএম পশ্চিম ত্রিপুরা জেলা কমিটির সম্পাদক রতন দাস সহ জেলার চার মহকুমা সম্পাদক। উল্লেখযোগ্য দাবিগুলির মধ্যে ছিল রেগা ও টুয়েপের কাজ প্রদান, পানীয় জলের সংকট মেটানো, বিদ্যুৎ সমস্যার সমাধান, বেকারদের কাজের ব্যবস্থা ও প্রাকৃতিক বিপর্যয়ে ক্ষতিগ্রস্ত কৃষকদের আর্থিক সহায়তা প্রদান ইত্যাদি।

\*\*\*\*\*

#### **Deputation :**

সি,পি,আই(এম) কৈলাশহর মহকুমা কমিটির পক্ষ থেকে আজ S.D.M এর কাছে নয় দফা দাবিতে দাবিপত্র পেশ করা হয়। দাবিগুলোর মধ্যে ছিল, ঝড়ে ক্ষতিগ্রস্ত পরিবারগুলিকে আর্থিক সহায়তা প্রদান করা, সর্বত্র বিশুদ্ধ পানীয় জল সরবরাহের ব্যবস্থা করা ইত্যাদি। আজকের কর্মসূচিতে উপস্থিত ছিলেন, দলের ঊনকোটি জেলা সম্পাদক কৃষ্ণেন্দু চৌধুরী, মহকুমা সম্পাদক বিশ্বরূপ গোস্বামী প্রমুখ।

\*\*\*\*\*

#### **Disaster Management-Sepahijala :**

বিপর্যয় মোকাবেলা বিষয়ে এক সচেতনতামূলক আলোচনা সভা আজ সোনামুড়া টাউন হলে অনুষ্ঠিত হয়। ভূমিকম্প, খরা, বন্যা, তাপপ্রবাহ ইত্যাদি বিপর্যয় দেখা দিলে তা কিভাবে মোকাবেলা করতে হবে, এই বিষয়গুলির উপর আলোচনা করেন NDRF, রেডক্রস সোসাইটি, পুলিশ, টি.এস.আর, অগ্নিনির্বাপক সহ বিভিন্ন দপ্তরের আধিকারিকগণ। এদের মধ্যে ছিলেন সোনামুড়া মহকুমাশাসক অরুণ দেব, রাজ্য বিপর্যয় মোকাবেলা

শাখার রিসোর্স পার্সন অরবিন্দ চৌধুরী, টি.এস.আর সেন্ট্রাল  
ট্রেনিং ইনস্টিটিউট গকুলনগরের বিপ্লব কুমার দেব প্রমুখ।

\*\*\*\*\*

#### **CPIM Deputation-Khowai :**

সিপিআই(এম)-এর পক্ষ থেকে জনস্বার্থ সংশ্লিষ্ট একগুচ্ছ দাবীর  
ভিত্তিতে আজ খোয়াই মহকুমা ম্যাজিস্ট্রেট মেঘা জৈনের কাছে  
ডেপুটেশন প্রদান করা হয়। এর আগে সিপিআই(এম)-এর  
একটি মিছিল খোয়াই শহরের বিভিন্ন পথ পরিক্রমা করে।  
দাবিগুলি ছিল কাজ, খাদ্য, পানীয় জল, শিক্ষা, স্বাস্থ্য, সড়ক  
সংশ্লিষ্ট বিষয়ে। এই কর্মসূচিতে উপস্থিত ছিলেন বিধায়ক নির্মল  
বিশ্বাস, ডি ওয়াই এফ আই-এর রাজ্য সভাপতি পলাশ ভৌমিক,  
সিপিআইএম খোয়াই মহকুমা সম্পাদক পদ্ম কুমার দেববর্মা ও  
জিএমপি নেতা রঞ্জিত দেববর্মা প্রমুখ।

\*\*\*\*\*

#### **Health Camp :**

বিলোনিয়ার ঈশ্বরচন্দ্র বিদ্যাসাগর কলেজের এনএসএস ইউনিটের  
দত্তক গ্রামে আজ উত্তর সোনাইছড়ি এডিসি ভিলেজের চণ্ডী  
ত্রিপুরা স্মৃতি কমিউনিটি হলে এক মেগা স্বাস্থ্য শিবির অনুষ্ঠিত  
হয়। শিবিরে বিনামূল্যে চিকিৎসার পাশাপাশি ওষুধও বিতরণ করা  
হয়। কলেজের অধ্যক্ষ ড. মনোরঞ্জন দাস জানান, ঈশ্বরচন্দ্র  
বিদ্যাসাগর কলেজের এই দত্তক গ্রামের উন্নতিকল্পে এনএসএস  
ইউনিট এবং কলেজ কর্তৃপক্ষ সব ধরনের সাহায্যের হাত বাড়িয়ে  
দেবে।

\*\*\*\*\*



**Baishaki Mela-Belonia :**

বিলোনিয়ার বনকরে ওরিয়েন্টাল ক্লাবের উদ্যোগে গতকাল থেকে শুরু হয়েছে ৫ দিনব্যাপী দ্বিতীয় বৈশাখী মেলা। আজ মেলার দ্বিতীয় দিনে শিশুদের বসে আকোঁ প্রতিযোগিতা সহ নানা সাংস্কৃতিক প্রতিযোগিতা অনুষ্ঠিত হয়।

\*\*\*\*\*

**Dipak majumder-Old Age Home Foundation Day :**

বড়জলাস্থিত অবলম্বন বৃদ্ধাশ্রমের ৩৬তম প্রতিষ্ঠা দিবস উপলক্ষে আজ বৃদ্ধাশ্রমে একটি সাংস্কৃতিক অনুষ্ঠানের আয়োজন করা হয়। উপস্থিত ছিলেন আগরতলা পুর নিগমের মেয়র দীপক মজুমদার সহ অন্যান্য বিশিষ্টজনেরা।

\*\*\*\*\*

**শরবত বিতরণ :**

অল ইন্ডিয়া ড্রাইভার ওয়েলফেয়ার এসোসিয়েশন ত্রিপুরা শাখার উদ্যোগে আজ আগরতলা আমতলী বাইপাস রোড সংলগ্ন এলাকায় গাড়ি চালক ও পথচারীদের মধ্যে শরবত বিতরণ করা হয়। উপস্থিত ছিলেন সংগঠনের গোমতী জেলার সভাপতি শাহজাহান মিয়া, উত্তর জেলার সভাপতি শিবা পাল, আগরতলা কার্যকর্তা নূপেন শীল, সজল দেবনাথ, উত্তম দাস সহ অন্যান্যরা।

\*\*\*\*\*

**Inter School Cricket :**

সদরের আন্ত: স্কুল ক্রিকেট প্রতিযোগিতার আজ অনুষ্ঠিত দুটি খেলায় কেন্দ্রীয় বিদ্যালয় ও হিন্দি স্কুল জয়লাভ করেছে। নরসিংগড়ের পঞ্চায়েত মাঠে অনুষ্ঠিত বৃষ্টি বিঘ্নিত খেলায় কেন্দ্রীয় বিদ্যালয় ৯ উইকেটে সেন্ট পলস্ স্কুলকে এবং তালতলা মাঠে অপর খেলায় হিন্দি স্কুল ৯ রানে প্রনবানন্দ বিদ্যাভবনকে হারিয়ে দেয়। বৃষ্টির কারণে মাঠ ভেজা থাকায় সকালের দুটি খেলা বাতিল হয়ে যায়।

\*\*\*\*\*

### **Senior Cricket Santirbazar :**

শান্তিরবাজার ক্রিকেট এসোসিয়েশন আয়োজিত মহকুমা সিনিয়র ক্রিকেট টুর্নামেন্ট চ্যালেঞ্জার ট্রফির আজকের ম্যাচে কুষ্টারঘাট তরুণ সংঘকে ৩ উইকেটে পরাজিত করে জগন্নাথ পাড়া প্লে সেন্টার। আজ বাইখোড়া মাঠে টসে জিতে প্রথমে ব্যাট করতে নেমে কুষ্টারঘাট তরুণ সংঘ ৩০ ওভার ৩ বলে ১৬২ রানে অলআউট হয়ে যায়। দলের পক্ষে মিঠুন দেবনাথ ৪৩ বলে ৫১ রান করেন। বৃষ্টির কারণে জয়ের লক্ষ্যমাত্রা ২৩ ওভারে ৭৬ রান হওয়ার সহজ সুযোগ পেয়ে ১৩ ওভারে ৭ উইকেটে ৭৬ রান তুলে ম্যাচে জয়লাভ করে জগন্নাথ পাড়া প্লে সেন্টার। বিজয়ী দলের সৌরভ পাল ৪২ রানে ৫ উইকেট লাভ করে।

\*\*\*\*\*

\*\*\*\*\*

### **Weather :**

আগামীকাল আকাশ আংশিক মেঘাচ্ছন্ন থাকবে। কিছু কিছু জায়গায় বজ্র বিদ্যুত সহ বৃষ্টিপাতের সম্ভাবনা রয়েছে। আজ

দিনের সর্বোচ্চ তাপমাত্রা ছিল ২৮ দশমিক আট ডিগ্রী সেলসিয়াস এবং সর্বনিম্ন ২২ দশমিক ছয় ডিগ্রী সেলসিয়াস। গত চব্বিশ ঘন্টায় আগরতলা বিমান বন্দর এলাকায় বৃষ্টিপাতের পরিমাণ ৩.৮ মিলিমিটার। আগামী ২৪ ঘন্টায় উত্তর, উনকোটি এবং ধলাই জেলায় বিক্ষিপ্তভাবে বজ্র বিদ্যুত সহ ঘন্টায় ত্রিশ থেকে চল্লিশ কিলোমিটার বেগে ঝড়ো হাওয়া এবং ভারী বর্ষণের সতর্কতা জারি করেছে আবহাওয়া দপ্তর। বাকি জেলাগুলিতে ও বিক্ষিপ্তভাবে বজ্র বিদ্যুত সহ ঘন্টায় ত্রিশ থেকে চল্লিশ কিলোমিটার বেগে ঝড়ো হাওয়া বয়ে যাওয়ার সতর্কতা জারি করা হয়েছে।

\*\*\*\*\*